



拚攔先生文集卷之六

蘇東坡

古詩

後迎駕行

揮鞭衝曉露歸鞍載夕陽一日復一日不見御袍黃左社
須文繡羶車奉圭璋作意禮樂盛而乃訪毛嬙上皇襲太
平珍怪來四方竒器驚鬼劃舞要欲雲翔端為大盜積萬
里來貪狼文移急星火搜扶到毫芒伐柯則不遠吾道其
復昌君看天宇間紫微已輝光躍馬今朝去定拜御爐香
惡衣供禹御茅茨覆堯堂為邦消底物人心歸則王

鄧成彥邀李益之朱喬年及其一飯適忌日無侑
觴者遂遲明日成彥偶在式假以食素謝吾三人
朱且行僕因以詩促之

點額萬里歸元坐冷如水慙愧比阮賢為余欣設醴既邀
折檻朱仍約騎鯨李人乳已方丈清歌遲皓齒那知事大
謬反誤占食指得鹿倘是夢翻羨得無鬼我生飲紅裙萬
事空一洗所失如蜩毛豈惟一飯耳端恐荀陳會自此參
辰矣憑公反高陽勿專蘭亭美主人或素餐蘇晉端可擬
何妨具大烹肉食從客鄙

偶成

我涉江東路平地雪盈尺明日登芙蓉晴天開曉日揭自
婺源來陰雨連朝夕瘦馬逼雲際又斷簷間滴顧我亦何
人市朝欲掃迹平生詩酒交落井仍下石那知涉畏途乃
煩造化力要知萬里行人謫非天謫衡雲霧韓愈海市呈
蘇軾君知此理不鬼物護狂直

古意 三首

妾身如暮雲陰霾愁漸濃即來如曉色日高雲自空曉色
未應夜愁雲不可重會持一杯酒舉室生春風

其二

妾心如寒梅隨卽遍江東妾身如飛雪知落何亭中雪花
故清絕何人能擊節梅花歲々春千秋香不滅

其三

妾如傍籬菊不肯嫁春風卽如出谷鶯飛鳴醉亂紅亂紅
有何好風雨一夕空菊英雖枯淡不愁霜露濃

觀子陵畫像

陶朱防狡兔渭濱兆非熊先生但釣月君王友不從我昔
訪其迹磳光磨青銅呼公公不應天籟自號空何人知此
景携歸梵王宮乃知夜半力端在寸毫中

謁南齋諸友

青青門外竹練上澗中流水竹自相激天壤無炎洲我友
有高韻來爲挾策遊氛埃飛不到軒牕寸寸秋高文穿天
心細字編蠅頭氣豪欲騎月志銳定焚舟我來初過雨衣
衫空翠浮平生百斛塵一洗空不留歸來短檠下清風入
夢幽不知白蓮社肯容靈運不

再用南齋韻謝

沙溪清可啜遠山翠欲流翩然航一葦浩歌入蘆洲高堂

上木抄幽人事勝遊但足簞瓢樂不知天地秋我筆嗟無
口冥搜空掉頭何如三才傑等是齊川舟開卷騰光恠天
上卿雲浮阿雲又嗣音吾硯不欲留平生浪詩聲寒虫號
清幽已對狂道士從此敢吟不

登妙峯閣

維舟古木陰故人能倒屣相携步高閣千尺誇雄偉雨餘
天氣清宇宙空如洗對面碧玉峯去天不盈咫憑欄一超
然欲搏九萬里下視囂塵間蠢蠢魚蟲耳平生浪自苦馬
上肉消髀匆匆欲何之燒香更隱几入夜寂無人波聲攔
下起坐覺非塵寰雷霆生脚底

遊東山

草木得新露襲人吹冷香泉水夜相激衾枕自清凉我携
謫仙人眉目秀而長高懷洗塵累抵掌論老莊若人不世
有此景那可忘終宵跨皓鶴同作雲間翔

雲際嶺

蒼蒼九萬里拍塞雨天葩雲際在天上我去更携家不知
山高低晶熒浩無涯迴頭見侍香濛濛隔瓊花

謝丹霞老師

丹霞修何行天花雨紅英草莽化金碧宴坐十年成落筆
多竒語酬唱皆名卿微言寄禍福無心天籟鳴頃年來七
峯見我眼增明西來的的意一語貫三乘坐令塵土人彈
指悟無生別來今許久夜夢飛爽靈新詩忽入手春風死
草萌公以慧生定我自明而誠相望雖千里秋風共一清
去去勿作念明鑑無將迎

玉山避寇

前年十月間胡兵滿大梁小臣阻天對血涕夜霑裳去年
十月間左省謫征商補舟歸無處江淝俱豺狼今年十月
間叛卒起南方官兵且二萬一旦忽已亡一身幸無責奉
親走窮荒天宇如許大八口無處藏空山四十日盡餅誑
飢腸竭來古招提和氣霽修廊迎門有禪伯梵行照宮蒼
却念客無歸燒豬飴蘇卽方袍二百指祖燈其復光中有
護法人義氣干天槍倒床得甘寢不知冬夜長明朝曹夫
子破浪飛危檣八門郁春色滿船載瓊漿高談譎霹靂佳
句刻琳琅那知奔竄中一樂得米甞何當掃陰雪四海共
春陽便携我輩人浩歌歸醉鄉世事如奕棊臧否均亡羊
蓑衣可釣月底處是金章

次韻李舍人

道山文章伯杖履作幽棲筆硯為戲事業落翮黑螭平生
百萬言定相初不離更憐世間士塵網深相闡笑踵雙林
轍誓破萬夫疑八面列神王劔戟森雋持怒目幹龍宮機
緘絕謀惟佛語浩無際天地如可彌笑談一轉畢璿璣時
未移見者皆了了鈍根化神機不然分三藏誰能俱不遺
白頭鑽故紙底是出頭時此恩今欲報四顧將誰依在佛
本無說於公亦何為珍重謫仙人登山力未疲天涯渺萬
里着處即為歸隨緣作贊嘆妙語何竒竒置之天壤間千
古無敢非我生多肉障煩公示寶篋請作一言蔽牟尼即
仲尼

送李司錄西赴

晴雲從竒峯烈日破昏霧謫仙有行色朋僚傷遠送嗟哉
君子人簿書久倥偬文星應長庚勁氣模蟠螭愔然玉京
去佇聽朝陽鳳巖野豈能留端肖高宗夢

塵外堂

俯仰天地間紛紛塵垢耳市井與山林累人均一體有真
故有妄無彼那取此謂是為塵外政應在塵裏憑師一掃

空六塵不用洗淵默即雷聲萬川同一水

謝李令人題額

寸草春未報秋風樹不停三年真忽尔過隙白駒奔廬墻
吾豈敢北堂有老人作庵居釋子佛事勤朝昏太史憐此
意高顏揭顯親梁間垂玉筋壁上靄飛雲顧我何為者傳
家空一經棲遲已三十寒窓尚短檠北轅將適楚揆手或
翻羨那能為親顯只可充添丁但念我先人白首困飄零
射策不逢賞青衫脫王庭今烏逢太史發揮身後名坐令
九泉下冷骨復生春顯揚政在此松楸萬世榮作詩敢論
報欲為肌上銘

陪李梁溪遊泛碧

凉天夜無雲寒江秋更碧冷照月華中水天同一色畫船
渺中流三更群動寂清風遠相隨蘆花秋瑟瑟近山得桂
香隔煙起漁笛樓臺半有無疑是化人國我生本無事釣
竿勤水石今宵更可人仍侍君子側浪登元禮舟本非謫
仙敵斂手看揮毫光芒騰萬尺

本上人

乞食自王城駿筆揮萬紙開緘動心目忽忽龍蛇起便可

老煙霞聲價日千里那知未滿意更訪拚櫚子拚櫚亦何
人是心如灰死惡語滿人間春風自桃李馮君一笑揮萬
事空一洗但了風動幡在處針投水願將廣長舌語出亦
糠粃迴到我輩人政堪覆醅耳

和作哲送令德

我瓠非五石安能枵不用但恃少年氣未肯就羈鞅越人
已斷髮章甫浪出宋何如子建文脫口人爭諷笑示善者
机綺語時一弄妙竟秘不傳尺管閣雲夢固應羞芳藻清
明奴隸共明年鬱梧桐定作啾啾鳳歸來訪原憲慎毋學
子貢故人猶未病及已能求中

宴坐軒

客食突不黔馬上肉消髀所得知幾何此生亦茅靡何如
豐巖公一室萬緣止竹林能清幽巖竇富竒偉閉門寂無
人燒香坐隱几今年忽猿驚杖屨數百里持此處宴坐老
師一啓齒我豈死灰如春風吹不起請君看九淵止水即
一洗

舫齋

寓形天宇間一枝慎所處到眼無溪山堆膏自塵土陳子

作舫齋端能世外趣
笑傲風波境恬無風波慮
循本魚可觀灰心鷗自舞
風景雖可人公乎聊四顧
紛上逐末流誰援沉迷苦
吾事在濟川慎勿五湖去

泛舟示子

秋江十日雨破浪飛危檣
恍如在天上萬頃煙茫茫
狂風自南來桂華雨新黃
停盃不須飲且飲空中香
平生四海心老大愧周郎
聊復隨孺子解纓濯滄浪
北斗挹酒漿天孫織衣裳
乘興拏舟去一笑上銀潢

萬卷堂

世人無遠韻校策干浮雲
識字僅有數得志無短策
大其妙家法不肯鹵耕耘
藏書浩無際兀坐觀滄溟
寒陋鄙李邕假書勤朝昏
過眼如杜甫散為筆下神
一家今四傑射策到王庭
自視猶細事家塾方討論
嗟我未聞道政作鑽帛蠅
會同阿戎去從公問斷輪

過黃楊巖

朔風夜號空干喁幾枝木
深山自春色芳草不凋綠
朋來得佳遊招提藏翠麓
新酒赤如丹竹萌肥勝肉
一醉出門去缺月掛脩竹
歸路沙溪淺危橋踐寒玉
夜過渭濱居門

庭故不俗對坐寂無語泉聲如擊筑宗盟更可人相邀勤
秉燭開緘得捷音豺狼俱面北迴棹今可矣賞心嗟未足
西去有奇巖佳名配土屋箕踞列十人未充空洞腹更約
林宗俱來伴白雲宿

飛螢

谷雨已十日不散陰雲頑夜風翼腐草借光蒲葦間往來
自相照似欣天地寬何時東方白紅日開雲端

次韻王信州古風

我昔少年日氣與風雷壯一言既不合掉頭歸望之誓將
老煙霞叩角耕開曠一日煩千旌叩天舒孟浪自譬舟一
葉沙溪春蕩漾百川儻已東吾力那能障尚賴天地寬未
即崇山放楫櫂付冷居乃為世所長老妻畫紙碁赤脚沾
村釀醉起舞采衣吾道頗休暢人傑又鼎來不怕供詩帳
酬唱激清風洗空煙雨瘴故人化鶴仙穹廬共悽愴生還
義更高裹飢遠相餉演山見長庚醉眼不敢仰便結騎鯨
遊不知飛燕謗蘭亭最後來德齒灼所尚傷時雖慨慷論
事尤侷儻盃酒七峯下逸思九天上萬事俱可入抵欠娥
眉唱

再次韻謝之

四海王信州志氣若益壯家學九夷聞人物萬夫望若使
在廟堂天下無怨曠胡為一葉舟也泛閩溪浪顧余真斷
梗江淮付搖漾逢人輒傾倒涉世無隄障既念越人瘠仍
欲鄭聲放斥下九天來宜侶幽怪長一作幽怪
多宛長邂逅忽相
逢琥珀傾新釀大急賡歌詩曾臆賴舒暢我語無餘韻日
書甲乙帳得君驅鱷手不憂潮陽瘴三年去國心海隅日
悽愴東家久不燔稚子將無餉詩成皆置之萬事吾不仰
那復思重裘區區欲止謗明朝更可入芒鞋窮好尚遙知
翠微中高談得縱儻至樂麴蘖間虛名鍾鼎上輕重不須
論杯行且酬唱

再次壯字韻

昌黎論佛骨南行氣亦壯獻書請鏤玉却起北歸望香山
取風流詩酒事夷曠那知聞琵琶淚濺九江浪此身苦海
中風波隨蕩漾妄見分南北無乃眼中障嗟我果何人楚
狂本天放外物不須論有身今已長斥歸水雲鄉日醉蓮
花釀茗飲過陸羽禪悅得文暢安此更何求萬里脫氈帳
死生則置之北却豈俱瘴使君憐我愚了無逐容愴謂我

耕白雲不獨齊眉餉詩來覓歡處光芒不可仰欲醉桃李
春那憂具錦謗赤脚敢云無社舞非時尚侯門列娥眉一
見吾其儻拋轉此當先積新君在上更為李與蘇兩家按
新唱

第四章兼簡其子

風卜雖蕭條虎筮固豪壯要皆有得失未息膏中望那知
方寸地太空等虛曠川逝水不流石高風自浪鄭五相府
榮謝三漁舟漾窮達安在哉但瞞肉眼障鼓瑟鏗尔捨扶
杖曝然放在我本不則底處更求長獨掛百錢遊無人提

私釀醉歸一腹春滿帟揮琴暢

風俗通記凡琴曲和樂而作謂之暢因憂愁而作謂

之操珍重江左王德邵宜絳帳天遣千里來不顧閩山瘴人
言臭味同政可慰悽愴誰知金玉予詩成即相餉筆力到
天心開卷人爭仰但勿賦兔葵小兒易生謗獻之詩更奇
句法晉宋尚從渠得精深嗟余真恍儻何當日相從煩君
更語上徑追太古風三嘆聊十唱

荔子

荔子有佳品乃在府城東我來方秀發黃雲幾萬重遙知
香味色已具碎花中凭欄一念足不食意自充人世如夢

耳尚躰色即空謂是為真實便可侑千鍾謂是為非實真
飽亦何從虛實兩無有樓高雨濛々

避地山谷

大禹不到處石壁誰鑿開雲端欲相搏飛出白雲來餘沫
亂飛雪雉聲敵春雷沂流湧百尺銀山陟崔嵬顧我雖逐
客解雨已春迴嗟此天盡處胡為乎來哉萱堂有垂白蓬
室紛提孩內外三百指奔竄若為懷我疑雲水間亦有天
下才何時日三錫一振紀律頽羲和儻中天六合無羲埃
鼠壤與蟻穴不風尚自摧坐令陋巷中依舊樂顏回亦能
書夷狄朝會叩天諸

次韻王信州遊樓雲

勝遊出林杪參天僅一分從君如附驥顧我願為雲野色
連空碧幽香襲露薰耦耕當卜此橫笛夜相聞

栢欄先生文集卷之六終

栢欄先生文集卷之七

書

上龜山先生楊博士

鄉姪鄧某謹裁書上提宮博士先生閣下嗟呼世人學者
急於爵祿之奉綴緝腐語以追時好凡不可以取青紫者
無復給視窮年兀兀老死章句識者悲之至於卓犖環竒
之士未始數數於此者則必箕踞高吟遊心景物收拾天
地精英以實錦囊直鄙時輩為嘈嘈蠅蚋若不可與之言
者殆不知畫餅象龍均於無用又烏可以五十步笑百步

哉幸而有知讀聖人之書而求其所以言者不得於經則必求於世儒之說即世儒之說而求之其親見異聞往往出人意表恍惚變化不可捕捉凡所言者皆人之所不可言凡所行者皆人之所不可行悉心竭力莫知所歸則又將去而之佛老矣嗚呼道之不明真學者之不幸也某於衆人不幸之中若天與之幸者得遊於令婿知默之門雖駑鈍之質不能窺測其涯涘然竊嘗聞之知默之言得於先生先生之學非有瓌偉倣詭之論喬詰卓犖之節以聳世俗之觀聽獨於行止疾徐而知堯舜之道於不為已甚而得孔子之心其所言者人皆可言也其所行者人皆可行也某之心於是知所嚮某之力於是知可以勉矣蓋亦嘗因其可言者以思其所未能言因其所可行者以思其所未能行時見先生卓然不可企及嚮風之勤願識之志徃徃參前倚衡如或見之今先生去而家於毗陵徘徊鄉郡某適在此幸可以瞻拜履寫此某所以輒布區區之誠仰干將命初不知其才之可進與否也昔儀封人將見孔子曰君子之至於斯也吾未嘗不得見也古之人其樂見君子也如此然儀封人之賢否雖不可知而其姓字且不

見於論語則亦必無大過人者某雖不肖不足以望君子之塵至其樂見君子之心於儀封人若無甚愧不識先生肯與之一見否干冒威嚴皇懼之至

上劉廷康

某月某日南劍州上舍貢士鄧某謹齋戒沐浴裁書東拜寓獻判府經略大學相府先生鈞席某嘗讀顏真卿杲卿及張巡許遠四公列傳見其為唐社稷奮身不顧守節死義名高日月未嘗不拊髀而嘆曰嘻天地英傑之氣勃鬱未吐不知幾千百年乃鍾若人以為萬世標準是豈可多

得哉故天下之人有脅肩諂笑能容悅者亦不敢借此數公以諛今之君子雖好大喜功不計能否欲追配古人者聞此數公亦必竦然起惕然懼歎然而不敢當也嗚呼是果不敢當乎抑有待而後傳乎天地英傑之氣亦安知其不再吐耶今年睦歛寇嘯山谷奮臂疾呼而群小附之攻城圍邑江浙騷然官吏狼顧喪魂沮氣棄城而遁者不可勝數會稽大府又賊所必爭之地奔命來寇動以千計中外聞之莫不為之股慄也而判府大學報國赤心可動天地驅兵力戰卒保城池使賊衆纍然殲破草拆是可謂障

百川而東之迴狂瀾於既倒者也其視大唐四公又不知孰為優劣哉雖然平原日寤真卿棄之常山力竭杲卿死之睢陽之救不至張巡許遠亦連頸就戮夫真卿之去雖出於不得已要非功成而名遂者三公死節雖人所難然身可死也其於民社之寄無乃誤所委乎故以功烈論之則四公猶有所愧獨於先生一無疵焉蓋節義等於四公而勲又遠也嗚呼至矣其不可企及哉此非特某之私言也迺天下之公論亦非特天下之公論也顧雖如先生謙冲退託亦不能自謂其不然也以今之人慕彼四公且勤勤若此又不知後世之人企望先生盛德復何如哉某雖無似其生得與先生同時且家於閩中而喜於從學又獲與令弟為壘壘之友家於閩中是鄰先生之居也喜於從學是習先生之業也獲與令弟為友是其姓字可以達於左右者也其天幸如此顧雖家有老母不能遠去掃門執鞭以快平生之願而揮毫染翰寫此精誠亦安得獨後於衆人乎雖然亦僭矣以一介賤士而千萬世之功臣貴賤賢否不啻霄壤其率爾之罪固亦不勝誅亦何恃而敢為哉蓋先生既立已然之功必建未然之策雖竒謀妙美已

定留中而芻蕘之言或有可採者此某所以願有獻也某無他能解頗通古今曩聞盜賊之興私切念其既治其已盛又欲阻其方來故仰求縉紳先生之論俯採匹夫匹婦之言考諸古而不違質諸今而可用研精極慮得十策烏欲進九重恨無因也効死有志窮鱗可惜謹寫之別卷以干台視伏幸先生留頃刻之暇聊賜一觀或無甚謬有可用者惟先生委曲而審處之非某敢自擇也昔者有為浙東觀察使者張籍相距於五千里外輒以書寓達而不以僭易為嫌得非學者所為大人君子當有以恕之乎又况籍盲於目既為廢人矣且不能遣語而託韓愈代之又其所以區區自叙者亦不過求錢財以濟醫藥耳是皆無足取也某雖晚進不足比數於人然論才與志則非籍比儻使今日得出甄陶之下而不與草木同腐則竭力自効亦必不至為門下辱也區區毫楮豈能既此心哉干冒鈞重不勝惶恐戰慄之至

代人上縣令

時年十五

某聞士人趨走王公大人之門有為名者有為利者有不為名利者為名之士朝夕汲汲兀坐冥搜一篇之出唯恐

人之不已知也為利之士訴窮叙德緘封求謁號寒啼飢若不能朝暮者有不為名利者其患難之人乎某也無狀蓋將患難之事仰首一鳴以期左右之見念矣某囊如垂磬地無置錫家父執役於公以給伏臘而某不免寄食於村落與十數學生相聚少資束脯以申反哺之恩驅馳近歲昨日方還雙親欣然遂寬倚門之望殺鷄為黍各相勞苦父輕醉且遽然而起曰公有事烏不可緩也遽到公庭鴈鶩以進反以酒故遂陷囹圄嗚呼痛哉一歲之勤將成一日之歡又豈知一日之歡反作一家之禍乎幸望先生察其終始之情原其平生之迹若果酣酒無賴無文犯法者先生罪之某復何言哉但痛心疾首而已矣若歲暮冬寒父子忽然相覩閨門之內把酒相勞則其情可恕某今日伏拜庭下幸先生垂骨肉之恩故雖殞滅亦不足為先生報也憂懼之深言不成章俟罪而已

與胡左司

某頓首再拜丞公左司老兄某平日議論動與時左脫身風波棘荆滿路流落海邦不敢齒一時縉紳之列比者邂逅人傑從遊許時每聞勁論浩然歆塞天宇下視異類誓

不比有然後知吾道猶行於士大夫之賢者使抑鬱亡聊之氣亦可以少慰其萬一也自左右持節西歸峻遷宰屬念欲上狀以致區區且以謂左右學問淵源蓋有所自而議論英發出人數等勤勞最久尚居庶官之右此又何足以為左右慶乎雖然社稷安危之所託四海生靈休戚之所係一時賢不肖之所以進退實在乎廟堂諸公耳今與廟堂諸公反覆議論能可否乎其間者二三都司可而已然則左右新除顧不亦重乎若吏抱成案則占位惟謹謾不省何事此固無可言者若以平日愛主憂民之心施於仕宦可行之地而從容乎二三知己之前此亦何惜而不盡言乎倘使吾言行於廟堂之上而澤及乎九州之遠則吾道固已行矣又何必身到廟堂然後為道行哉然廟堂之論其來舊矣熙豐間如司馬溫公與王荊公之所爭者曰是非與非崇寧間陳了翁與蔡長沙之所爭者曰治與亂靖康間李丞相與耿門下之所爭者又不特是非治亂安危而已其存亡所繫乎夫以二百年社稷存亡之機止在今日議論間聞之令人食不下咽則廟堂之所以贊人主與夫左右之所以助廟堂者亦豈可嘗試為之以苟歲月

耶此事非公不可責非某不敢以責公亦幸祕之毋示他人也經曰有言不信尚口乃窮此道固窮於時矣豈窮於吾人哉惟丞公察之溽暑伏惟台候動止萬福更乞加愛以膺三接謹具啓不宣

與李狀元工部

某頓首再拜頌之工部狀元老兄自羅源人去忽忽具狀併以惡語呈浼想無不達者即日溽暑伏惟台候動止萬福某客此餘年巢南之念無食項置但以鄉里殘破之後斗米千錢雞豚蔬笋一切無有疫癘大作死亡相枕遂不能即去且復煩止耳但不知仰俯三百指意將焉歸乎水到渠成之語東坡其欺我哉雖然窮中之味非吾輩不能堪非處之久不能知其味之永也頃在都城陷身虜帳幸而脫歸又落風波之地烈士梟首時無不免賴聖主赦於必死遂獲南歸方安畎畝為終焉計又為寇盜所迫來客海隅今雖困卧流離豈不愈於前日九死之地乎以此亦能日安幸老兄毋重為小人念也老兄湖南之行竟可免否蘭省亦豈能久留老兄耶官無大小要行其志志不可行則袖手旁觀一時士君子進退出處之節彌綸獻替之

道與夫談笑議論之餘其善者固可師而不然者亦可戒此杖藜觀物化亦以觀我生之義也豈不愈於紙上之學乎順之學官識高追配古人固無事此然捨此亦無以寓吾志也蓋所謂優哉游哉聊以卒歲耳丞公數相過否輒以數字免之議論狂直殊愧犯分然吾徒所以相好政在阿堵之中知我罪我俱在春秋乎貫道早晚如閩中想遂相從子安失意將不安此德和將罷新任文明亦以替去迴首前日鳳池之遊豈非夢耶然人生孰非夢聚散無常即生滅法於此思之則生滅俱滅又何足計乎欲言無窮恨不能多幅何日握手一笑以寫此心臨紙東瞻精爽俱逸更冀惠序加愛以壽君親

答黃德美

某頓首某罪逐屏居精爽寥寥忽接來教詞義灼然固已驚畏徐閱二章浩然有御風騎氣之興不覺捲卷而起曰天其或者遣此英才以慰我亡聊乎士人中固有高才者但筆力無來處流為馬異李赤而恬不知怪刻舟膠柱泰然自以為得意此有志於文墨者所以為其大息也德美句法抑按已逼蘇黃此天下士也豈易得哉然子路終身

之所誦者孔子以為何足以減蓋待子路非衆人之比耳
德美浮沉里巷問能不作富貴之念乎能不恤世眼之青
白乎能不畏禍患死生之逼人乎某聞志在一邦者當恤
一邦之毀譽志在天下者弗恤也志在天下者當顧天下
之重輕志在萬世者不顧也德美來書尚介於一邦此非
僕所知也孟軻之文雄於戰國韓愈之文妙於李唐惟能
不介其小者故能若是其大也蘇黃之文幾於比肩及其
絕塵黃且瞠若豈筆力之罪耶然東坡謫居海外若不復
振者而剛大之氣常充塞乎天地之間山谷少不得意則
作小偈以贊王介甫間於東坡微有譏焉則生死富貴已
懾其氣爾所以為山谷者果安在哉吾黨均學蘇黃者也
中有涇渭不敢獨享因書以告吾子無以示外使不知我
者而怒生癭也某近有數篇在謫籍不敢寄遠有新作無
吝見示未會切告為器業自壽不宣

答張居實

某頓首再拜久別辱書開緘如見君子寵喻詳備非愛人
以德者不能也某何人當宣和之末見九州需索東南一
空而花石之奉鼎沸無已學校諸生仰瞻白雲但相顧泣

下且自度曰聖天子未嘗殺一諫臣士大夫吞聲端坐願
固位耳偶得數章搥鼓以進雖為齏粉不顧也敢意包荒
未賜誅殛今得卽報乃有召命是將責我以前日未死之
軀以爲今日報也白日尚在赤心敢渝區區牛李豈所學
哉異時有遠此語公當出之則僕有何面目更行天日之
下耶反覆來書蓋知己者以報公所以不得不盡也春且
老傳道佳勝未見幸爲吾道自壽不宣

啓簡

上李右丞相啓

伏審光被殊恩擢叅大政士民交慶社稷增輝恭惟右丞
相公先生道貫天人氣充寰宇盡忠社稷遑恤妻孥初擢
栢臺嘗斥脫靴之力士繼親香案遂同折檻之朱雲扁舟
既落於窮山尺帑不干於要路惟居窮固略無希進之心
故位崇高不爲患失之慮敢陳大計默契宸衷洗空天上
之旄頭擁出雲端之北極措九州於磐石脫萬姓於虎牙
撥亂殊勲既出子房之帷幄守成有道更資傳說之藍梅
穀腹絲身要觀寔効泥金檢玉何取虛文某頃以青衿久
從絳帳兀居閩嶺但足一泓之牛蹄坐想沙堤上搏萬里

之羊角雖乏攀鱗之業幸為擊壤之民其為欣愉寔倍倫等

上李右丞相簡

某頓首拜覆比觀邸報切聞入叅大政欣躍之餘連夕不寐蓋非謂大厦已成預為燕雀計實幸斯道有傳而海內均福也國勢委靡無如今日然紀律已定夫何患哉百姓足君孰與不足太平可以指日矣天下幸甚

再啓太平日久不聞鈺鼓之音一旦羽檄星馳天下騷動窮鱗不能致死但揮涕耳伏聞先生定大計建大議毅然以身當之笑談之際脫萬姓於累卵之危顧豈近世學者敢望其後塵哉所幸者樸菽散才得先天下之願識者歎陪杖履於山水之間吟詩飲酒作終年計其為欣幸可勝言哉

頃在閩中不知世事如許每得謦咳及之但見蹙頞若不
自勝者及來京師於所聞歸拜北堂無復西意敢意今日
得觀人傑起佐聖君復祖宗故事與天下息肩遂尔安然
為太平民知幸知幸

嘗觀崇寧以來火元祐之文以塗天下之目凡官於其時

者皆斥而不用未嘗不失笑也天下公器自有輿論故人之賢不肖亦何與於年號耶甚矣小人之惡君子也不知大軀但極其私心耳然君子之惡小人亦猶是也儻極其情則亦無所不至矣於此照之不落一邊政賴中庸之道昔竊觀先生有包荒之德不為卓絕苟異之行蓋於行止疾徐之間而得堯舜之道不為已甚而見仲尼之心者也今也甄陶天下亦何事於芻蕘之言耶然事師之道猶事君也苟有所聞敢自隱乎懔懔易易

寄朱喬年

某頓首再拜數千里之遠才抵舍便見君子遂作許款慰懌之懷殆非毫楮所能既也平津送別還復黯然比辰起居如何臨政當有神相某前此狂妄幸脫虎口今當疏泉種竹作安烏計但遠去吾喬年而令德諸友又復他適兀坐深井日覺茅塞耳儻不我棄幸時惠書併近日新作切懇餘惟為吾道百卜自壽不宣

某頓首再拜天王大風一首聊叙別後眷眷之私二兄略不見和豈簡驩耶但吾黨中人洞見肺腑不敢以此奉疑耳便風幸首見及也徽城楮煤泉南二香及韓黃墨刻皆

勝物也非吾子不能有非老弟不可分幸早專人以慰此
鶴立至望至望俞人傑秀才蓋名家之子也頃在泮宮嘗
與同舍云於左右曾有一日之雅今在治下他無所求惟
覓一安下處想不難應副也干聒不罪堂上太夫人尊嫂
宜人萬福令子安樂否老兄貴恙今想平復要當柰煩去
之有漸可也藥物有効者點記一二時服之其他雜方幸
一切置之為妙灸瘡作否俎豆之間戒之良易衽席之上
非斬釘截鐵者不能慎也然所望吾喬年與喬年所以自
期者當自知之其可以頃刻之造壞此無窮之計乎越祝
代庖雖為可厭要臂已有三折則能明醫故不可不盡也
許薄伯仲余思晦黃彥武諸兄近方作書更不及縷布也
某再拜

答吳時中

某頓首再拜時中秘校吾友 坐下作別益久馳仰殆不勝
言專人損教感服友誼仍審即日尊候萬福某託庇粗遣
未有承晤之幸敢祈百千自壽前膺殊選謹上狀不宣
某頓首再拜啓罪逐孤蹤日復一日便當叩角作歸農計
但時勢未寧恐不可以安枕耳時中養閑里閑事業當益

進也一丘一壑自有高韻世間榮辱不足介念此間朋友
雖不乏人議論才學類有可取但進取之志時津津然見
於顏面間出處殊塗終不能滿意時中有暇能惠然肯顧
否木牛石馬當有以為公獻也謝丈閑居為衆人作佛事
使鼠竊狗偷無敢窺其境者乃知此公志在愛人非自為
也世間小人雖閨門之內尚與兄弟分彼此孰能克已如
謝丈乎想左右亦有以助之此皆朋舊間美事良為助喜
也欲言無窮但不能多幅耳某頓首再拜

答陳夢兆

某頓首再拜上啓知縣朝奉丈 坐前夏熱伏惟宰字多暇
神明贊祉尊候動止萬福某託庇西來已造建安行遂叅
見但切忻愉謹先奉狀起居不宣

某頓首再拜前日承書疊幅尤荷意勤來卒徑之沙陽更
不具狀上謝想蒙照亮某誤蒙召對實出獎提幸見君父
以攄所欲論者非恃教誨何以副九重之望哉即干提耳
得毋金玉其音也某頓首再拜

某再拜搬家之喻極荷見教前日被受聖旨今日下就道
再有火急起離指揮前後九十有一次催促自顧何人敢

遲延既對之後即歸迎侍使老人不冒畏暑以登途蓋兩便也如何如何

栢網文集卷之七

